



六

8



望雲樓稿卷九八

古吳念陽徐如珂李鳴父著



祭言

祭徐警所先生文

蓋聞管氏有言生我者父母知我者鮑叔噫嘻以余而視公誰謂管鮑之交于今不可再復憶余之未遇也蕭然衡門不過困鹽車而櫪伏公非有故素之知一旦以禮為羅儼然延之家塾余乃衣冠垢敝覲焉就賓師之位公知我之貧也而恭敬弥肅余亦推魯

少文未諳所謂罄折周旋也者。公知我之誠也。而推
赤置腹。遭予家之多侮。則一歲而虛臯比者。迄無寧
日。公知我之制于時也。而不謂碌碌值余費之不貲。則
無何而支館穀者。殆以倍計。公知我之不得已也。而
不以我為瀆。有時握手而論心。則形骸可忘。詎有踰
于骨肉間。與圖事而揆策。則肝膽盡露。計有灼于龜
卜。嗚呼。交情至此。豈惟今世無兩。即管鮑復生。亦不
得擅美于獨意。仁者之有壽兮。積善積慶。必且脩享
夫五福。詎天道之無知兮。淹然忽然。公已歸之不祿。
登公之堂兮。音容既邈。嗟几筵之沉陸。對公之靈兮。
知已淪亡。能不淚盈。其撲遶雖然。人生特寄耳。苟
制行之不虧。亦何論乎淹與速。緬維公之生平。孝友
睦嫻。昭昭在人耳目。亦越公之令嗣。圭璧瑚璉。既已
有美而韞匱。異日者。搏扶搖而上之鵬程。九萬立可
致之一蹴。煌乎封章來自九天。始信善人之必
有後也。誰謂公死之為盛。

祭巨源周夫子文

蓋某自髫髻時，即從夫子游，至弱冠始卒業，數年間，有愛某之深如夫子者乎？有知夫子之素如某者乎？潛心大業，矻矻窮年，夫子之學問也；發抒心得，力追大雅，夫子之文章也；端方嚴毅，與人不阿，夫子之德行也；明白正大，可與天知，夫子之心術也；至如教我以道義而尤恤我，以饑寒式我，以模範而尤體我，以疾苦覺我，以愚蒙而尤戒我，以矜侈啓我，以所未知而尤獎借我，以所未逮吾師乎？吾師乎？成吾之息真。

與生我者等乎。憶昔步趨門墻，恍如昨日。而孰謂哲人云亡，竟至登其堂，不聞其笑語於乎。痛哉！雖然，夫子儒素不能自給，既而昌大其業，詎曰無祿。體怯若不勝衣，今且以天年終，詎曰無壽。年五十，艱于子息，晚而振振繩繩，詎曰無後。所恨者，蜚英鬻序，雅負時名，屢蹶場屋，卒老于行，幸而三子濟濟，為鳳為麟，方且冲天，方且驚人，夫非大德之報，不于其身，必于其子孫耶？是以某也灑淚陳詞，既為夫子悲，而復為夫子慶。

祭宮保大司馬楊莊簡公文

嗚呼！得全全昌，古語有之。始吾未信，乃見于茲。惟我公夙稟純忠，天下已任，追文正風，早佩朝珪，歆然若虛，工曹叙績，讓而不居，歷轉藩臬，風清弊絕，入尹京兆，吏畏民悅，洪都開府，德揚恩普，父老舍哺，童稚歌舞，帝乃嘉與，忠勤晉位，陪京既佐，將作復貳，銓衡，尋掌秩宗，又詰戎兵，股肱是寄，委任惟誠，公乃秋風動思，南國興懷，急流勇退，再疏乞骸，詔旨勉留，知弗可諧，為賜馳驛，為進宮階，時乃回郊多壘，天子

拊髀總憲久缺耳目疇咨具曰斯任非公而誰徵書
三至堅卧不移公乃優游田間漱枕泉石結司馬社
賭東山奕間語時事至感首額戀主心丹憂時髮白
庠子之春得中壽云以齒以德以爵以勲衆謀僉同
謂宜上聞所司奏之天子曰都我思老成矍鑠
是夫巫命禮官其典云何舊典具存是曰達尊臨軒
遣使慰問宜敦於皇盛典來自九閭公且登堂成
禮望闕拜賜稽首頓首懽忭之至脩馬思靜怡然
瞑視嗚呼出則股肱王室處則蒼生具瞻生則康寧
壽考死則羽化而仙所謂得全全昌者非耶况乎伯
氏蛟騰仲氏鵲起諸孫玉立譽髦濟二則繼響于公
之後者又将步武而齊驅也某也辱忝世誼幸附係
蘿西歲碌碌音問濶踈適滇之役詢公興止時聞無
恙詎謂不起山斗其頽後學安仰國無典刑令我
悽愴擷彼江茅縮此椒卮臨風一奠聊哭我私

8

祭右府德菴楊親翁文

人世之相與莫悲于死別一逝不復還聞者淒以切
况閔骨肉情能不倍哽咽於惟我親翁當朝一
二家尊人位八座伯氏上公車俯視予寒賤誰云非龍蛇
徧維辛郊秋邂逅殆非偶棘闈抵足談論心若舊友
為予述夢異期予占魁首倏爾徑三載有來議姻契
自慙豚犬兒寧作鸞鳳配輕財重然諾卓哉古人誼
洎翁宦苗都予亦戀京華南輪與北轅彼此各天涯
神情雖飛越音問良踈遐迨予謫滇南翁方衣錦還

殷勤慰勞我、藹然家人歡、方期長侍教、何知忽淹然、
一朝聞訃音、不覺相錯愕、在予失所好、在兒失所托、
撲漱淚潛潛、慘淡情寂寞、雖然人生特寄耳、聚散果
何常、存順沒亦寧、孔壽顏可殤、但求心不愧、何論數
短長、親翁壽非遠、制行良且紀、孝行在庭闈、忠誠在
閭里、試觀遐駕日、遠逝皆悲楚、况有伯翁氏、巍然作
棟梁、兼有寧馨兒、展也號珪璋、雖謂翁已死、予謂翁
某亦兒女親、寧不為翁戚、推數與循理、槐堂蔭可必、
神靈倘有知、幸其來昭格、

8

祭孝廉研山汪太親翁暨周太親母合葬文

造物所厚、曰惟不朽、古稱不朽、在昌厥後、若我太翁、
一代名流、文章德望、震耀齊州、太母來歸、為之內主、
拮据家乘、步趨女史、伯鸞德耀、輝映後先、相禮如賓、
中外肅然、丙子賓興、太翁崛起、凌風振翰、南溟遠舉、
大材將展、未棟而摧、懿厥太母、永蘖自持、濬發爾祥、
三賢克繼、濟、人文琅、國器惟伯、與季已就六翻、
一聞風颺、扶搖在即、仲為前茅、韶年奪錦、跬步台階、
和羹補袞、施及孫枝、玉立蘭馨、苞竒孕秀、以待時亦

慶集一門、伊誰之力、曰此二尊、貽謀、夔翼、嗚呼、噫嘻、造物無私、樹有秋實、樹者享之、誰如生前、夫貴婦榮、誰如死後、悠々、令名、誰如有子、為國名臣、誰如有孫、悉皆俊英、紫泥金簡、天語、諄々、錦衣鞶帶、鞶翟蔥蕪、馳封赫奕、聿章厥身、于此返真、可謂不朽、死而不朽、得天已厚、天之所厚、人焉奚憾、獨姜哲人為之永嘆、某也、仲子獲倚金玉、情切葭莩、義均骨肉、今聞卜吉、歸窆有期、素旒翩翩、注即幽居、雙玉終藏、泉臺永隔、執紼陳此、寫我身哀、蠹桂酒椒漿、生葛束白、臨穴一

酌涕泗盈臆

8 祭大中丞可泉宋公祖文

嗚呼、泰山莢莢、三峯寥廓、神秀所鍾、真氣磅礴、惟地之靈、篤生代英、秉心淵博、吐論崢嶸、為國柱石、為世準繩、操觚藝苑、早歲蜚聲、學宗濂洛、文邁西京、射策明光、名高金玉、出撫鳴琴、為民造福、植爾桑麻、剪爾蕪菜、三異十奇、聞乎輦轂、單車就徵、豸冠繡服、既居憲府、得展經綸、入則攀檻、出則埋輪、持斧代狩、吳蜀載巡、威惟霜肅、恩復春仁、帝嘉乃勲、俾貳京兆

廣漢齊踪不疑比耀建牙仗鉞所在澄清戢彼彞冠
安此陪京尋佐司寇于張是勗肺石無冤棘林絕哭
興龍舊都以江為固節鉞遙頒俾肅百度公初下車
嘗困二豎與天之靈忽藥而愈俄然一夕山傾海枯
公實形解柰蒼生何古人竭忠馬革自誓公終柩臺
無爽厥志鍾嶽而生騎箕而逝精爽安歸鴻蒙合氣
某夙稱編列棠蔭猶存執鞭白下惠好方新豈某倉
卒聞訃沾巾銘旌戒途將歸故里一觴告哀魂其鑿
嗚呼哀哉

8

祭劉太師母某夫人文

天祐皇家賚以良弼毓秀孕靈有所自出名聞在
朝賢母在室考之紀載班班可述於惟夫人坤精月
婺幽蕙含芳白珩式度德配姜源訓遵女傳飲必醴
泉棲惟琪樹言歸君子族係郊金鷄鳴暢御鳳曲諧
音雲達奮起憲臬尊臨勞臣鞅掌內助良深爰產雙
鸞文彩照瑋藝苑齊飛南宮魏絕捷並躋鼎鉉同裕舟
楫逆厥玉成九荻課業天子嘉之罷命再宣翟冠
為服鳳誥鸞箋優游祿養樂享堯天壽踰九袞直齊

大年應運而來乘化以往且駕祥雲身披鶴氅上兜
率宮放光明魚冷然御風翱翔天壤有子大孝慕以
終身曰吾母氏何遽上賓陳情闕下感動至尊從
優議卹泉壤蒙恩珂生晚末獲師夫子夙欽母儀情
深仰止忽聞訃音有淚盈咫歆拜靈幃匍匐職司于
里哀慕何以將之東芻遠致聊哭吾私

8

祭少宰復齋劉老師文

國于天地必有與立所立維何老成耆碩耆碩在位
庇民福國老成凋謝朝野交戚於惟先生萬人之英
手扶雲藻辭吐日星讀書中秘聲振詞林試士南國
浮薄是懲爰涉成均多士服習載佐秩宗神人和懌
帝鑑其忠銓衡是職山公雅度裴令卓識歲在協洽
實典禮闡英雄入彀濟：師：珂雖散質均辱受知
山斗在望朝夕焉依曾幾何時先生休沐滄海龍潛
丹穴鳳伏洛社優游鑑湖止且赫赫公輔蒼生注目

養重丘園幾二十年堂有壽母彩戲斑斕惟忠惟孝
聲聞九天辟書徵召夢卜禮賢中外臣民待相司馬
彈厥壯猷霖沛宇下胡天不憖白雲遙駕嶽毀梁摧
遠近哀訃天子聞之減膳撤樂賜葬及謚息禮
優渥詎曰非榮國將安托世無典刑慘淡寂寞珂
門墻倍切淒愴登不見堂徒設衣裳溪毛止水不腆
是將臨風洒淚寫我徬徨

代朱軍門祭徐撫臺文

嗚呼強場之臣宜激匪躬免從事而邁竒窮固所
遭之不幸乃以表烈烈之赤忠嗟此蘭賊無端發難
駭波驟起于地上猛獸突出于檻中巢溫淮汜一時
並見三川宜有此劫數而遂先中于我公嗚呼哀哉
妖鳥集署震雷擊蓬毅然不顧鼓枻而東白刃驟加
奮袂當鋒舌歆盡而猶罵血化碧而不紅衣冠倏爾
蹂躪文武慘其一空世界至此倒翻彼蒼抑何憎
自昔宸濠之亂吾鄉孫忠烈獨樹千古之英風迄今

百餘年而公復遘此蓋豪傑之生原以維世居常為
良殉難為忠公與前哲殆時異而道同媿予薄劣共
事蠶叢叢痛綢繆之鮮策復橐鞬之未克驚魂罔措
大敵忽逢百日墨守泣血臨戎致妖魔之潰遁實幽
冥之感通既而負嵎失險元惡就籠強梁信其無益
日月復爾昭融維靈在天默相多功公有令嗣重蘭
忽有淚如海有恨成虹一朝憑木可忍哀痛顧維
利鈍德由化工睢陽常山亦何羨于冥鴻公視予不
薄予亦既竭其愚蒙公之眷屬旋返故宮公之節義
指日 褒崇公其素車白馬往來於五溪三峽之間
以庇此顛侗乎抑騎箕上天以默贊 聖主之威雄
乎自今以往公亦可以浩然而閉此雙瞳矣

祭林母某太安人文

古有賢母厥惟孟陶斷機截髮以勗譽髦惟太夫人
 實追古淑夙嬪名門孝慈婉篤中饋攸司蘋蘩是效
 黃鵠興歌栢舟矢操和丸訓荻母兼父道三尺藐孤
 翩翩有造相彼令嗣間出之英克成母志鳳起蛟騰
 筮仕吳會司李待平成均振鐸師範嚴明爰擢番樞
 方輿是克職詰戎兵宇內寧謐譽命升聞帝嘉乃績
 龍章褒美錫母禕翟于時夫人稍慰愁腸祿養方新
 儉約是將躬親摩績誠凜敬姜曰子大夫爾其無忘

皇
 朝
 宗
 廟

一麾出守五嶺之南千里將母百福正駢維守循良
人思壽母益啓褰帷澤覃珠浦胡馬寶婺遽掩精光
蹕躔鸞馭賓于上蒼時則嶺人皇皇若失借恂何由
潛焉烏邑其于令子舊忝子民甘棠餘蔭母範猶存
聆茲哀訃不覺淚零陳詞荐酒少展私心雖然人誰
無死母死不朽有德有名有祿有壽况乎報不酬德
者其報彌厚則夫將來之福祉固當世世而長久也
母又何憾焉

8

8

祭太嘗卿舍初洪年兄文

嗚呼公可謂殉國之臣矣筮仕海邦初調化琴而公
宵旦經營無少暇逸保障增其百雉搜剔祛其三窟
茹荼飲冰七年一日此其殉國者一既循資而為郎
何清華之可冀而公勉思職業罔有失墜譯館輯其
雄心儲講陳其至計一切典禮悉經條議此其殉
國者二出而叅藩實鎮漳南海氛水患民何以堪而
公畫地築堡設糜分甘紅彘驅之卧榻赤子納之蓋
函此其殉國者三爰總司憲紀綱重地吏治民生于

焉攸寄而公激濁揚清平反宥肆墨後聞而洗心赭
衣曰之釋累此其殉國者四敬歷秦藩以右攝左屬
有遼難羽書旁午而公內固我國外飭其武微發不
絕于塗輸將時繼于伍此其殉國者五既長東藩是
稱岳牧蓮妖驟起所在縮胸而公單車叱馭居中運
轂理渤海之亂繩使潢池之佩擯此其殉國者六晉
位奉嘗亦云顯秩雍容養望待遷可必而公必躬必
親是豈是飭奉 聖駕于南郊執玉帛于寢室此其
殉國者七臣力既殫臣病斯劇杜門養疴起居宜遠
而公戀 主心丹憂時髮白誓夙夜之在公雖濱死
而靡易此其殉國者八殉國之臣國家所賴以投艱
大濟緩急而一旦乘箕上昇與化俱翕國豈何所主
持有位為之無色某叨講世誼情同休戚忽聞訃音
有淚欲滴覩令子之翩々知書香之脉々公何憾乎
九泉庶洋々其來格

祭王母賴太夫人文

於惟夫人婺曜之精西儀毓秀七閩鍾英生而聖善

夙有令名來歸望族姜如齊聲定省高堂鷄鳴下床

孳讀佐荼苦相將相我夫子穎脫宮墻出宰東粵治比

龔黃篤生令嗣明堂偉器早聽臚表旋游粵地竹馬

重迎潘輿再試五載良循惟母所示治成異等徵書

昱亟入侍鳶坡出巡方域母氏有訓恪守乃職奉以

周旋紀綱振飭國有勞臣簡自聖明晉位九列司

天下平退崇所自惟母之貞金章紫誥珈珮續紛百

祿既申、五福未已、宜享上壽、以膺遐祉、胡不少需、祥
雲西指、夢斷慈闈、淚乾孝子、雖然有盡者、數不朽者、
名昔以夫貴、今以子榮、生有封典、歿有賜塋、以德以
福、世莫與京、某誼忝猶子、夙仰母儀、一朝聞訃、兩淚
交頤、薄陳不腆、聊寫哀思、大孝孺慕、肝裂心摧、至人
不死、夫又奚悲、

8

祭八十一壽纘翁曾太公文

惟昔人之啓佑、事莫著于槐堂、世積累以滋大、後勃
發而寢昌、惟我公之纘祖、紹槐翁而有光、生岐嶽而
穎異、誦過目而不忘、稟嚴君為師、保益肆力于文章、
數雖竒而未售、志屢蹙而弥張、守清白之遺訓、日淡
薄以自將、難得者西昆弟、嘆鍛羽于雁行、傷心哉、藐
諸孤、俾奮翮于膠庠、折產而居、硯瘠舍宅而奉、烝嘗
盖家廟之為亟、豈田舍之是遑、既臨財無苟得、復仗
義多慨慷、戚嘗黨待而舉火、貧士免于絕糧、信勤施

之不忘實誦義于無疆三槐比其積德再世果爾發
祥肆我師而振起當公世而顯揚由中臺而尚璽躬
三被夫龍章望既高于月旦禮遂秩乎賓觴彼蒼錫
以難老舉世曰為周姜謂期頤之可致胡一疾而徬
徻豈厭薄夫塵世乃翱翔于帝鄉其受知令嗣獲忝
門墻風景行而仰止忽聞訃而感傷慨儀刑之既邈
宜涕泗之徬徨念槐陰其正茂殆奕葉而未央異日
者我師致位于鼎鉉諸孫濟美于廟廊將公之家世
與天無極而公之寵命與日俱長人謂公已逝予謂

公不亡敬致奠于冥冥庶昭格于洋洋

8

祭少保戶部尚書武英殿大學士東鶴丁公文

惟

國所倚賴惟在相臣股肱王室康阜兆民盡忠竭慮
不有其身於惟我公海內名流讀書中秘簪筆螭頭
入司紀載出典薪樵歲在戊午東事遽起時有推轂
公心非是為效忠言不出所擬適有采薪請沐言旋
身居泌水望重木天司馬未相中外喁然今上龍
飛徵書但之旋晉端尹旋陟講帷既佐秩宗遂贊倫
司東事孔亟上厪宸衷公條萬言侃侃赤忠天

子嘉之為寫一通魚水既投相得若渴竟公生卒回
彛可撻胡天不仁遽爾降割初公來京家累未隨疾
革之際語不及私但曰 皇恩戀主知訃聞于朝
夫我良弼亟命所司從優議卹君臣之誼有始有卒
某忝在同籍知公最深一朝長別令我涕零有芻一
束有酒一酌聊陳哀此庶其來歆

8 堂祭祖父母文

嗚呼我祖乃振古豪傑而我祖母亦女中丈夫也承
先世餘業却而不居而辛勤起家幾與素封等乃好
行其德使三黨與九族沾恩寒門與戚里分潤即陶
朱散財孟嘗行義何加茲竟以勤施故家道日落無
幾微之悔于厥心而錙銖之較于末路也我祖母亦
相與安之可謂積德累行始終不怠者矣然抱天下
之大德而位不稱享天下之大名而祿不酬豈天之
所以報善人者蓋有待歟迨我祖去世三年而不肖

珂始博一第珂登第未三年我祖母又已謝世總之
祿養無及焉嗚呼痛哉况乎辭世以來遠至二十餘
年近亦十六七載停柩在堂日復一日瑤等不孝之
罪上通于天矣今得吳縣十二都七畝君能字圩之
新阡卜之曰吉敢于某月某日庚寅奉我祖父祖母
之靈合葬于斯吾祖父祖母其徜徉于地下哉子孫
皆已成立家產漸已恢復即有一二尚在淺土者有
瑤等在無煩吾祖父祖母懸念也至如不肖珂被愛
尤深雖殺身而難報所不盡心盡力以克副吾祖父
祖母大志者有如此日嗚呼瑤等幼而失父吾祖實
即吾父吾祖實庇其孫而瑤等不能早康吾祖嗚呼
痛哉

祭黃母老姑文

蓋聞婦人之義以夫為天故婦無專制從夫則賢若
 我姑者有且述焉憶我大父母之有姑也以撫以摩
 不啻金屋之嬋娟及我姑之嬪于黃也克謹克戒何
 異孟光女之撝謙上事舅姑簪可脫裳可典不敢妄
 自菲薄以失二人懽下撫諸幼叔食可推衣可解甚
 且勉力贊助以締其姻媿相夫子于戎行則芑苴是
 戒徃轅門之內雀可羅而魚可懸從夫子于丘園則
 清約自將雖三品淑人如荆布女者然久而白首相

莊肅：雍：終其身無遽色無疾言晚而栢舟興咏
哀慕思悲汲：乎欲死之殉而生之捐蓋至今日而
淹然長逝也相從地下庶幾無憾而即安嗚呼婦制
其夫者無論矣即有明章婦順者孰如我姑之老而
彌篤貧而益堅况乎壽踰七袞翩翩乎羽化而登仙
將門有種行且封狼胥而勒燕山文孫濟：又見庭
有芝而室有蘭豈非我姑之生也以順為正故其沒
也得昌而全其誼忝猶子沐愛有年倏聞訃音能不
淚漣生芻一束聊陳几筵揄揚甚美庶後世之有傳

8

搗巢祭纛文

欽差兵巡上川東道四川提刑按察司監合江路軍
事副使徐 謹以太牢之儀昭告于 旗纛之神曰
奢逆不道犯我 王章去順效逆躡躑跳梁誅其惡
目尚不悔禍自恃險阻甘心負固 天地雖廣豈容
逆德 主上神武惟罪是執肆予小子監督一方簡
乘蒐卒將猛兵強維月之吉提兵深入 神其助之
殲此逆賊謹告

○ 祝毛蟲文

蓋聞天地之間、物各有主、陰陽之理、違天必誅、惟我先塋之有松與栢也、蓋用力多、積時久、而後成此鬱鬱葱葱之象、庶幾先靈安焉、而孝思寄焉、汝乃侵之、損之、得毋與人子之心、大相刺謬耶、况葬此土者、非他人、是吾父吾母、天子所贈、為命官、封為命婦者、也、貶封卹贈之地、鬼神且為呵護、汝以蠢爾微物、荐食茲土、是明與朝廷抗、不可訓也、且春生夏長、物之性也、草木方欣欣而尚榮、即斧斤不敢擅入、而汝

蠶食其中、不寒而易葉、未冬而改柯、其若上帝生之
之意何、夫傷孝子之心、當誅、抗朝廷之令、當誅、違上
帝之意、當誅、吾不難以火薰汝、以藥灌汝、以刀斫竹
箭粉糞汝、頤蠟飛蠕、動各有性靈、汝或溺于利昏于
害、亦未可知、何忍不以相告、竟以一切從事、今姑與
汝約、限以五日、則盡徙而去、否則再限五日、至十日
不徙、是冥然不靈也、是終不可化誨也、是忍于傷孝
子之心、敢于抗朝廷之令、而果于違上帝之意也、吾
則以前法而加于汝、必無一之遺類、而後已、汝其圖之、無忽

